

AUSPICIIS DIVINI NUMINIS!
DISQUISITIONEM MEDICAM SOLENNEM,
SISTENTEM

AFFECTUM RA- RISSIMUM, PERPETUI SUCCI NVTRITII EX THO- RACE STILLICIDII.

EX CONSENSU INCLYTI ORDINIS MEDICI

IN REGIA FRIDERICIANA,
RECTORE MAGNIFICENTISSIMO,
SERENISSIMO PRINCIPE AC DOMINO

DN. FRIDERICO WILHELMO
MARCHIONE BRANDENBURG. SCEPTRI BORUSSO-
BRENNICI HÆREDE ET RELIQUA.

PRÆSIDE

DN. FRIDERICO HOFFMANNO,
POTENTISSIMO REGI BORUSSIÆ A CONSILIIS MEDI-
CIS ET ARCHIATRO. MEDICINÆ ET PHILO-
SOPH. NAT. P. P. CELEBERR.

PRÆCEPTORE AC PROMOTORE SUO ÆTATEM
SUSPICIENDO.

PRO DIGNITATE ET PRIVILEGIIS DOCTORALIBUS

MORE MAJORUM LEGITIME CAPESSENDIS

D. XI. JULII M DCCIV.

H. L. Q. C.

Publico eruditorum examini submittet,

JOH. ERNEST. Seidenfrost/
Regio-Lothariensis Saxo. Medic. Pract.

HALAE MAGDEBURGICAE,
Typis, IOANN. GRVNERI, Acad. Typogr.

DISQUISITIONIS SOLENNIS MEDICÆ

Circa

AFFECTUM PECTORIS RARISSIMUM, PERPETUI SUCCI NUTRITII EX THO- RACE STILLICIDII

PRÆFAMEN INTRODUCTORUM.



Naturam ab arte adjutam miracula inter-
dum patrare, apposite pariter & ve-
rissime dictum esse arbitror; idque
toto die sicut ubivis in hoc rerum
universo, ita speciatim in micro-
cosmo nostro, machinam intelligo
vitalem, cuius sedulo attendenti li-
cet observare. Etenim si penitus

expendas stupendos in morbis effectus & phænomena quandoque mirabilia, si varias in corpore actiones reactionesque certo ordine tempore ac modo tam affabre & methodice, quin mechanica quasi ratione institutas, quid aliud ibi agit provida rerum conservatrix quam ut amoliri intendat omnia ea, quæ hæterogenea & exitiosa sunt, totius fabricæ compagem dissolvendo, ruinam ejus minitanti? Nunquam enim otiosa ibi cernitur, & nisi in opere turbetur, sed quotendat prudenter ducatur, nihil ipsi difficile est, intentatumque nil quicquam relinquit in fabrica nostra organica, quæ ad ipsam à malis liberandam & sartam te-ctam conservandam ullo modo faciunt. Hinc autem fiunt tot motiones morbosæ, quibus ceu instrumentis utitur, sæpius sat violentæ, quæ vel à peripheria corporis tendunt ad ejus centrum, & sunt spasmoticae, vel quæ a centro pergunt ad circumferentiam quos febriles appellamus, eum nempe in finem, ut alteret, imminuat, subigat atque excludat finibus suis, quodcunque noxium invenit, sive id quantitate, sive qualitate seu solo

motu ullo modo peccet. Omnia hæc autem, ut ut miratu digna sint, non tamen certo & deliberato consilio, sed necessaria prorsus connexione quin vere mechanice peraguntur. Qua de causa h.l. per *naturam* nil aliud intellectum volumus, quam *complexum variorum motuum vitæ alium, ex certa structura, nexu, situ ac dispositione partium solidarum & fluidarum ab autore Deo coordinatorum, ad conservationem corporis tendentium*. Interim vero, cum vires ejus sint admodum limitatæ, non mirandum est quod fine suo sæpissime frustretur optima hæc morborum medica- trix, medentium omnium facile princeps, vel quan- do medica ope plane destituta, vel quando machina hydraulica, quæ *συνεργα* esse debet, ob plenariam disso- lutionem potiorum partium sit destructa, vel quando interceptis viis necessariis aut plane deficientibus, ut explodat id quod eliminandum erat, porta patula nul- la datur. In talismodi igitur casibus, naturam, si debi- tæ suppetiæ ipsi ferantur, varias crises moliendo, tantum non miracula quandoque patrare non diffitendum erit, quæ obserata optime recludit, abstrusa pandit, & in via quævis nobis à priori impenetrabilia vilia, sibi facit per- via, ut exitum tandem inveniat morbo adæquatum, ipsi autem ægro salutarem. Felix demum medicus ille, qui ejusmodi naturæ conamina, & molimina critica tempestive observare, & quo ducenda sunt, prudenter dirigere novit. Nihil enim certius, nil tutius ac jucun- dius unquam agere poterit, quam ut magistrum arti- um naturam, tanquam ejus minister officiosus sequa- tur, eam in opere suo adjuvando, ad ejus ductum & normam se componendo, motus justo tempore sistat, vel si opus est excitet atque promoveat. Sicce enim pro- fecto fieri poterit adspirante gratia divina, frequentissi- me, ut in desperatissimis etiam casibus complures ægri miserissimi cum gravissimis pathematibus conflictantes, quin

quin conclamati & prognostico jam relictī liberentur & sanitati atque vitæ restituti, plures per annorum tractus salvi ac incolumes servantur. Haud absimilem igitur & notatu dignissimum casum in præsentī diatriba, loco speciminis inauguralis pertractanda, constitui-
mus in scenam jam producere, sistentem nempe ægrum ante XI. abhinc & quod excurrit annos gravissimo affectu pectoris, variis periculofissimis symptomatibus stipato laborantem, qui tamen peracta, per paracenthesin, in loco quem natura monstrabat, materiæ chylosæ ultra X. mensurarum evacuatione, oræ tancibus ereptus, hodienum per Dei gratiam, in vivis adhuc versatur. Hunc autem affectum rarissimum, uti partim ab ipso ægro qui eum perpeffus est, cum omnibus circumstantiis principalioribus fideliter communicatum accepi, partim etiam, quorundam pathematū & novorum subinde emergentium phænomenorum testis *αὐτόπτης* exstiti, sic etiam jam dudum præ aliis thematibus loco speciminis inauguralis mihi eligendum, jam autem ad mentem & ductum Excellent. Dn. Præsidis mei, Patroni optimi maximi, elaborandum, & circa ejus enucleationem pro ingenii modulo vires proprias B. C. D. periclitandas esse duxi. Igitur, hujus intricati satis nodi Gordii solutionem, dum paro & aggredior, ante omnia summi numinis divini auxilium, cui soli quævis dicta facta & cogitata, si salutaria esse debeant, accepta referenda sunt, piis suspiriis sollicito, ut mentem nostram ad veritatem, institutum autem omne ad sempiternam nominis sui gloriam utilitatemque proximi promovendam, velit dirigere. A lectori candido vero & cordato non nisi judicium æquum, erratorum autem, quæ, si iis convictus fuero, lubenter corrigere nunquā a verlabor-
veniam & condonationem benevolam mihi promitto.

HISTORIA MORBI.



Ir quidam eruditus, Mathematicus pariter ac Theologus consummatissimus, temperamenti cholericomelancholici, habitus corporis gracilis & strictioris, texturæ sensibilibioris, ætatis suæ 43. assuetus vitæ sedentariæ, & inter cibos valde delectans multis acidis, ad rheumatismos & decubitus seci acris valde pronus, ante XI et quod excurrit annos, tempore autumnali, postquam frequenter coryza, sæpius cohibita, laborasset, corripiebatur primum tussi quadam sicca & gravi, sine ulla materiæ ejectione ollam quasi cavam resonante, quæ constans durabat ad semestre fere spatium, donec tandem variis ex officio negotiis distractus, aerisque humidi ac frigidi injuriis expositus, feбри quadam acuta cum dolore lateris punctorio affligebatur. Inter medicamenta adhibita fuerunt etiam pilulæ pectorales opiatæ, quarum frequenti usu materia resoluta copiose quidem per tussim excreta fuit, sed absque levamine, citraque omnem *εὐφορίαν*; respiratio quippe anxiosa & difficilis manebat, cibi quoties assumpti erant, continuo per vomitum reddebantur, totum corpus macie conficiebatur, viresque exhauriebantur, ita ut vix per exiguum gressum sine magna molestia prosequi valeret æger. Hiberno tempore subsequente, cum nihilominus munia sua, licet ægre obiret, purpura copiosa accedebat, quæ pectus & passim totum corpus occupabat,

bat, quod cum exposuerat aeri externo frigido, mox retropulsæ maculæ evanescebant. Post aliquot dies vero accidit, ut circa tempus matutinum asthma quoddam subito invaderet ægrum idque quasi suffocativum, adeo ut ne sonum quidem edere posset, & dolores simul in pectore & abdomine vehementes perciperet, una cum obstructione alvi contumaci. Aucti cum tempore dolores per 12. dies noctesque totidem sine remissione sævitiam suam exercuerunt, qui corporis vires consumserunt, & tandem effectum quendum post se reliquerunt in ægro notabilem ad præsens usque tempus. Alvus occlusa tympani in modum distenta, referari haud potuit, licet præter alia medicamenta interne data ultra 20. enemata essent applicata, donec tandem ex usu succi pomi borsdorfiani simul ac semel flatus vehementes erumperent; quo facto abdomen antea extensum confestim collapsum comprimebatur, & æger sceleti quasi figuram repræsentans jaceret. Intra istud spatium autem 12. dierum, ineffabiles fere cruciatus æger sensit in corpore, horribiles vellicationes, rosiones ac dilacerationes mordacissimas; præcipue autem aderant sensationes ac si prunæ candentes intus laterent ac instar globulorum igneorum circa regionem lienis circumvolverentur. Notabile est autem, nil nisi solum caput ab his doloribus intactum mansisse, ingeniique vigorem integrum mansisse, licet propter tristem dolorum sensum lipothymia quædam nonnunquam intercederet, quæ tamen mox recessit. Collapso autem antea & compresso sic abdomine, simul dolores quoque pristini cessarunt, ast æger viribus plane destituus erat, ut nullum fere mem-

A 3 brum

brum movere posset. Totum enim corpus mox occupabat gravativus quidam dolor, ac si undique furunculis esset oblitum, unde durantibus his anxietatibus per 3. hebdomades, neque pes neque manus satis suum officium facere potuerunt, donec sensim malum decreverit. Cum vero ope aliorum jam electo affurgere tentaret, simul ac terram pedibus tetigerat, insignem & ineffabilem sensit dolorem in sinistro colli & humeri latere, non aliter ac si ferreo filo caput à sinistro versus dextrum latus divelleretur. Præterea notatu dignum est, pulsum cordis qui in sinistra pectoris cavitate alias se proderat, jam statim in altero latere, dextram prope papillam tactu & visu fuisse perceptum, unde æger erectum se tenere non poterat nisi dolori præsentissimo & acuto se vellet exponere. Cessante igitur jam in totum ipso pulsu in latere sinistro pectoris, aliud phænomenon se sistebat: nempe ab osse sterni usque ad spinam dorsi sinistrum pectus expansum distendebatur, extuberabatque paulatim instar gibberis magni convexi, ut cor atque pulmo in latere dextro quasi in angustum spatium coarctarentur. Adebat simul summa præcordiorum anxietas, respiratio difficillima, & si pede sinistro terram attingere volebat patiens, singulis passibus quasi depressus humum procumbere cogebatur. Somnus per totam noctem erat irrequietus propter tussim continuam, nec citius quam horis matutinis somnus capi poterat, ultra horulam non perdurans. Appetitus erat omnino prostratus & licet cibi sumerentur, deglutiri tamen vix poterant, quoniam ventriculo ejusque orificio superiori ob coarctationem vehementem nullum fere spatium
hospi-

hospitandi cibos relictum erat, unde ægrum oportebat sæpe parumque cibi capere. Hac morbi ejusque symptomatum facie omnis fere spes valetudinis recuperandæ evanuit, ut etiam consensu Principis serenissimi, totiusque Consistorii, æger munere suo sacro sponte se abdicaverit, postquam per 4. annos integros malum hoc durasset. Interea misere sic degens vitam interdium in sella, noctu vero in lecto sedere & tussire continuo cogebatur. Iacere enim non poterat nisi latere sinistro, dextro vero latere se inclinare non licebat, propter metum suffocationis; nam gibbus ille qui ex sinistro pectoris cavitate magis magisque extuberabat, incrementum sumebat, non solum respirandi sed & cibum & potum capiendi impedimentum præbebat. Varia quidem in usum vocata sunt medicamenta, sed omnia in casum, ut tandem tumor œdematosus qui antea modo obfidebat pedes, ulterius abdomen occupans & ipsum quoque caput ascenderet, unde oculi valde prominebant, & mors ipsa jam imminere videbatur. Hoc tempore accidit, ut chirurgus quidem haud imperitus forte fortuna interveniret, qui locum affectum aspiciens, facile autumabat, magnam materiæ copiam in cavitate pectoris collectam esse, eamque intra membranas extimas, quasi folliculo suo collectam esse, scite judicabat. Hinc cum istam materiam per paracenthesin educendam esse, constitutum foret, ipse hanc operationem B. C. D. aggressus est. A tergo itaque intra costas statim supra diaphragma situm habentes beneficio instrumenti cujusdam ferrei bicuspidis perforabat cutim, & cum ulterius pertingeret, in-

ter-

terne sonus excitabatur ac si vesica aqua distensa, pertusa rumperetur; quo facto postquam instrumentum extraxerat, confestim effluxit materia quædam consistentia ac colore referens lac album, omni fœtore carens. Quantitas autem materiæ prima vice emissæ pendebat ad libras tres; intrusa igitur turunda, vulnus deligabatur. Peracta hac operatione duplex ex ea commodum percipiebat æger, (1) ut pulsus dolorificus & anxius cordis in latere dextro illico cessaret, (2) ut statim post deligationem libere circumambulare posset, citra pristinum incommodum. Subsequente die altero, extracta turunda, vulnereque instrumento quodam ampliato, de novo emissæ est materiæ portio ad libras 4, & eodem die vespere, cannula plumbea est intrusa, per quam materiæ quantitas iterum 4. librarumeducta est, ut tali modo diebus circiter 4. ingens materiæ quantitas ultra 12. mensuras sensim ex cavitate pectoris educta, fuerit collecta. Curiosum autem erat peracta jam evacuatione istius materiæ, quoties corpus conquatiebatur, exinde auditum fuisse strepitum in cavitate sinistra, ac si strophium quoddam in aqua volutaretur, qui motus vero non ultra aliquot hebdomates post apertionem factam perceptus fuit, postea non item. Posthæc adhibitis sedulo decoctis vulnerariis, aliisque medicaminibus necessariis, æger cum morbo in gratiam redire cœpit, ut spes subitæ restitutionis jam imminere videretur. Nihilominus tamen circa aperturam istam nonnunquam inflammationes, & tumores oriebantur, præsertim cum infusiones liquorum vulnerariorum cum syphone, & eductiones materiæ per cannulam, quæ operationes non sine dolore

lore fiebant, peragerentur, quæ symptomata tamen sponte tandem remittebant. Post 3. annorum spatium meatus aperturæ istius callo & cartilaginea quasi substantia obducebatur, unde cannalicula metallica non tam commode intrudi nec materiæ effluxui liber exitus concedebatur, cum alias per foramen hocce, post materiam etiam aer tanto cum impetu egredi solitus sit, ut flammam candelæ admotæ exstinxerit. Sequenti autem tempore per aliquot annorum tractus, sine impedimento materia ista continuo affluens quotidie educta est, & quidem singulo 24. horarum spatio, quoties vulneris apertio & deligatio peragitur ad quartam partem mensuræ vini, sive ad unciam XII. vel semi libræ medicæ pondus. Cæterum materiæ qualitas & color ordinarius semper fere idem est, nisi quod pro diversitate ciborum assumptorum, modo ad flavum magis, modo cinereum, modo brunnum colorem accedat, unde etiam consistencia quandoque spissidior, quandoque tenuior apparet. Si forte guttula una vel altera sanguinis ex improvisa læsione interne facta, simul prodeat, illa non miscetur intime cum ipsa materia, sed manet separata quoad colorem suum rubicundum. Talis modi in statu quoad jam vixerit vir laudatissimus, partim nullum in corpore ejusque membris quoad carnosam substantiam augmentum, partim nullum virium sufficiens robur sensit, nec potentia pollet diu multumque circum ambulandi; reliquarum imbecillitatum corporis accidentalium ut nullam jam mentionem faciamus. Hæc omnia tamen in actionibus externis nullo impedimento ipsi sunt, quo minus studiis in museo operam navet, quin & foris munia necessaria obire & ipso in suggestu quandoque sermones ad populum cla-

ra & distincta voce licet sedendo habere valeat. Magis itaque sedentaria vita fruitur quam stataria; quoniam membra corporis stando & obambulando justo diutius, mirum in modum delassari sentit. Frigus externum & aerem humidum ac nebulosum vaporibus repletum minus perferre potest, cælo autem sereno existente melius semper se habet. A frigore enim intenso statim tumor & inflammatio circa aperturam subsequuntur, item ventriculi debilitas, ructus continui & vomitus esculentorum quæ assumserat; à colore autem externo licet fortiori non facile læditur. In deligatione si nimium aeris thoracem ingreditur, faucium vehemens constrictione cum tussi molesta sequitur. Post evacuationem materiæ autem singulis vicibus institutam, semper in fine sibilus & flatus aeris per siphunculum ex pectore prodiens aures ferit, indicio omnem materiam jam esse evacuatam. Diæta utitur tenui, & simplici & magis liquida quam solida assumere solitus est, præsertim juscula lactinia ac pultacea, mirum in modum autem delectatur acidis. Præter has jam recensitas in ipsa historia morbi circumstantias, notanda quoque ante omnia erunt, phænomena alia curiosa huc usque observata. Scilicet post apertionem istam in latere sinistro thoracis versus dorsalem regionem factam, quotiescunque ad mundificandum vulnus & diluendum pectus liquor quidam, constans ex vino hispanico vel etiam aqua cum radice Chinæ, sarsaparill. &c. decocta in cavitatem ejus per syringam injectus est singula vice, post horulam unam vel alteram subsequutus est, paroxysmus quidam perfecte febrilis. Deinde notabile est phænomenon, si quandoque acciderit, ut deligatio & cum ea evacuatio materiæ per

per aliquot dies fuerit dilata¹, eam insolitas vias quæ-
visse, & noctu, dum incumberet vir laudatus sinistro
corporis lateri, excitata tussi molesta & expectoratione
violenta ex pulmonibus per arteriam asperam & tandem
per os exivisse, & quidem notabili quantitate, sapore in-
star emulsionis præ se ferente, quo facto ægre ad assue-
tum locum reduci iterum potuit. Idem phænomenon
etiam observatum fuit, cum in itinere constitutus, cannu-
lam metallicam alias perpetuo foramini intrusam, per
diem unum, ne incommoda exinde curru vectus senti-
ret, extraxerat. Si morbis quandoque, & rheumatismis,
quibus frequenter obnoxius est, Vir plurimus reveren-
dus, affligitur, & cibo ac potu parciori utitur, nihilominus
materia ista evacuata in quantitate & qualitate parum im-
minuta apparuit nec immutata, quin sæpe numero majori
copia ac in statu sano prodire visitur cum magna virium
labefactione. Denique attendi merentur reliqua phœ-
nomena, circa ipsam materiam evacuatam experimen-
tis institutis, observata. Mixta nempe si hæc fuerit cum
spiritu quodam acido, v. g. salis, nitri &c. nulla notabilis
mutatio, nisi quod dilutior paulo et quasi exaltata colore
apparuerit, observari potuit. Simulac vero cum alcalico
liquore v. g. oleo tartari per diliquium combinata est alia
materiæ portio, indensata ac viscidior illico facta est, ut
ad ulnæ longitudinem extendi & in fila quasi dilatari po-
tuerit. Cum spiritu vini rectificatissimo quando mixtio
instituitur, materia statim coagulatur instar casei recen-
tis. Si seorsim vero reponatur non immutatur, nec faci-
le corrumpitur aut foetida fit, nisi per multos dies aeri
aut calori exposita, ab motum intestinum peregrinum,
puredinem concipat.

RESOLUTIO CASUS,

& quidem

SECTIO I.

DE ORIGINE, NATURA, AC INDOLE MORBI.

§. I.

INter myriades morborum & affectuum, quorum variis insultibus obnoxia est humana mortalium conditio, non solum, nec semper notos & solennes occurrere videmus, tot retro seculorum observationibus medicis jam notatos, verum etiam prorsus novos, incognitos & ignotos plane hospites in scenam non raro produci, quos cum nulla adhuc eorum notio in foro pathologico habeatur, haud immerito innominatos appellaveris. Tam insolita enim sæpius sunt & portentosa, quæ observantur pathemata, tam complicati quandoque & anomali affectus, nullum analogismum cum aliis habentes, ut quo nomine congruo eosdem indigitemus, non facile suppetat. Horum ad classem si ullus, certe omni jure referendus est præsens circa cujus tractationem jam versamur affectus pectoris rarissimus; quorum similem vel ratione loci affecti aut partis læsæ, vel ratione symptomatum ac phænomenorum singularium, tum etiam respectu morbi ipsius, ægro minus exitiosi, vix ab autoribus observatum, nec ullis ephemeridibus annotatum invenies.

§. II. Morbum quidem dicendum esse illum, extra dubitationis aleam positum, cum & Hipocratis effatu omne id quod corpus humanum quocunq; modo affligit, dicendum sit morbosum; sed ad quod genus morbi, cujus essentiam adæquate exhauriat, referendus sit, haud adeo proclive est decidere. Dijudicari tamen id optime poterit, non tam à priori quam à posteriori rationibus petitis: ex actionum nempe vitalium, quarum integritas primario vitiata est,

læsio-

læsione probe perspecta ; quæ cum potissimum fundata sit in sensu motu ac nutritione, quoad omnes quidem vitium quoddam animadvertitur, maxime tamen quoad posteriores, motum nimirum ac nutritionem. Has enim operationes notabiliter partim depravatas, partim si non abolitas, valde tamen imminutas esse, haud obscure indicat perpetuum succi gelatinosi ac nutritii, qui alias in substantiam corporis abire ac verti debebat, quoad notabilem quantitatem, ex thorace stillicidium.

§. III. Omnis autem hujus fundi calamitas, malique prima scaturigo cum procul dubio in thoracis cavo quaerenda sit, non alienum à scopo fore duximus, ut prius hujus structuram examinaturi in amœnissimos physiologiæ & anatomix campos paulisper exspatiemur, & selectos ibidem flosculos ad diagnosin nostri affectus ejusque phœnomena explicanda summe necessarios decerpamus. Bene enim Galenus monet, *fieri non posse, ut qui id quod secundum naturam fit, non noverit, dignoscere possit id, quod præter naturam accidit.* In hac itaque regione cum fontem vitæ nostræ, primum illud saliens, cor intelligo, absconderit natura, non mirandum est, tam affabre eam constructam & fabrefactam, tantisque propugnaculis contra injurias externas non sine causa esse munitam. Etenim præter involucria, ipsi cum aliis corporis regionibus communia, extrinsecus non solum validis satis musculis, quorum quovis latere sex numerantur, tanquam vallibus circum datum est pectus, sed & utrimque costis XII. ceu mœniis, antè sterno, in postica autem parte vertebris connexis, undique cinctum, quarum 7. superiores veræ ac legitimæ; 5. inferiores, quoniam non nisi interventu cartilaginis sternum attingunt, vocantur spurix. Has intra costas singulas in utroque latere singuli considerandi sunt muscoli, interni XI. &

totidem externi utrimque, quorum fibræ se mutuo interse-
cant per modum crucis Burgundicæ, seu literæ X. omnes-
que inserviunt costarum elevationi & dilatationi ipsius
thoracis. Cinguntur hi muscoli interius membrana sua
propria, pleura dicta, totum pectoris concavum investiente,
quæ mox duplicatur seque à vertebra usque ad sternum
extendit, tumque dicitur mediastinum, quia pulmones tan-
quam septum intermedium dividit. Præterea notandum
quod intra hanc duplicaturam incedat vena azygos, di-
spersis passim ramulis suis, item arteriæ & nervi interco-
stales, quorum omnium originem & usum hoc loco in-
timius rimari operæ pretium erit.

§. IV. Arterias igitur quod attinet intercostales, quæ
in sinu cujusvis costæ cum venis & nervis comitatæ re-
sident, superiores ejusdem rami 4. ab arteria subclaviâ, in-
feriores 8. à trunco aortæ descendente ipso, immediate
progignuntur, qui omnes sanguinem ex corde pro nu-
tritione ad has partes afferunt. Sequuntur porro venæ in-
tercostales, quarum inferiores originem suam debent ve-
næ azygos sive sine pari dictæ, à latere dextro trunci venæ
cavæ superioris abscedentis. Hæc enim dextrorsum re-
flexa & vertebrarum lateribus applicata singulos ad sin-
gula spatia intercostalia transmittit ramulos. Superio-
res autem venæ intercostales à latere exteriori venæ sub-
claviæ prope ejus initium exoriuntur trunco simplici, qui
in duos vel tres ramos dividitur, per spatia intercostalia su-
perius ubi deficiunt rami venæ azygos distribuendos. Va-
sorum lymphaticorum comitantur ubiq; canaliculis & ar-
teriis, a quarum furculis quasi germen ab aliena arbore
pullulant, ductuq; inverso in ramos & jam unciculos partim
in venam cavam partim in venam pulmonariam abeunt, &
re-

receptos ab arteriis humores ex rivulis in rivos tandem cor ipsum, revehunt.

§. V. Jam ad nervorum propagines ac distributiones devolvimur, quæ ad pectoris partes præcipue ejus musculos intercostales tendunt. Observandi igitur h. l. maxime sunt nervi 2. intercostales, ita dicti, quod ejusdem diramificationes intra pectoris cavitatem costarum radicibus accumbant, qui originem suam parium quinti & sexti nervis acceptam referunt; etenim unus nervorum sextæ conjugationis & binirami majoris anterioris, nervorum quinti paris surculi juxta utrumque fellæ equinæ latus simul coalescentes, in truncum nervi intercostalis desinunt. Egressi autem ex calvaria circa cervicem in tumores oblongos seu plexus gangliiformes excrescunt, è nerveis fibrillis arteriis & venis pia crassaque meninge involutis compositos. A plexu hoc cervicali truncus deorsum fertur ad claviculam, ibidemque bifurcatus, arteriam subclaviam stringit & fere circumligat. Thoracem vero simulac ingressus est, constituit plexum intercostalem, qui ramulos in singula spatia intercostalia dimittit. Deinde ex thorace egressus idem nervus per diaphragma ad ventriculum tendit, & postea in mesenterium delapsus præcipuos abdominis plexus constituit quorum infiniti surculi & fibræ ad viscera & intestina distribuuntur, unde tanta harmonia & consensus partium corporis, ut ut longe ab invicem dissitarum, haud obscure deduci potest & demonstrari. In primis vero octavæ conjugationis nervi per thoracem discurrentes & ad infimi ventris partes dispersi, suum symbolum huc contribuunt, quorum descriptionem uberiores, reservamus in ordine symptomatum examinationi.

§. VI. Hisce jam prælibatis breviter nunc ad dignoscendum affectum nostrum & causas phaenomenorum mirabilium reddendas, citra magnam difficultatem jam descendere licebit. Ut autem, cujus indolis ac naturæ sit, eo melius demonstremus, consultum erit ut decisioni nostræ præmittamus rationes quasdam dubitandi, sicque remote prius procedentes, quænam morbi species, comparatione inter easdem instituta, locum hic habeat, nec ne, determinemus. Statim itaque disquirendum erit, an etiam apostematis cujusdam vel vomicæ pulmonum inter initia morbi subesse potuerit suspicio, cum tussis sicca ac vehemens, respiratio difficilis præcordiorum magna anxietas, adeo constanter duraverint, totumque corpus, exhaustis viribus ejus, macie confectum sit. Sed respondemus statim quod non. Talismodi enim apostemata cum ex tuberculis scirrhosis ac duris consent & plerumque parva sint, sine incommodo singulari diutius subsistere possunt, donec tandem maturentur, unde difficilius fere cognoscuntur quam curantur. Quoniam enim membrana propria tanquam cystide inclusa sunt, vicinas partes vix afficere, nec gravia symptomata inde solent inducere, donec tandem maturatæ ac ruptæ, simul ac semel corruptionem suam aliis partibus communicent. In nostro autem affectu dolor non tam gravativus quam acutus & punctorius perceptus fuit cum inflammatione musculorum intercostalium & febre. Deinde materiæ excreta non fuit purulenta & foetida, nec sanguinea, etiam non una vice ἀργόως καὶ βιάως ejecta fuit, quale quid in apostematum ruptura semper perspicitur. Denique nec paracenthesis habuisset locum tali in casu, præsertim si vomica adfuisset pulmonum.

§. VII. Neque statuendum esse ducimus, febrem illam subsecutam inflammatoriam, qua laboravit æger, cum tussi sicca continua, dolore lateris punctorio & respiratione difficili comitatam, dici posse pleuritidem veram, licet pleraque signa illam mentientia adfuerint, multo minus peripneumoniam. Etenim cum certum sit in hisce affectibus pulmones principaliter esse affectos & inflammatos, pleuram vero tantum per accidens, in nostro autem affectu contrarium facile possit demonstrari, ubi labes primario in interstitiis musculorum intercostalium eorumq; ruptis vasis concepta, pulmones autem non nisi per consensum & communionem vasorum demum affecti sunt, sponte hæc opinio cadit. Impossibile enim est talvis adhuc legibus motus anatomicis & regulis mechanicis, stagnantem sanguinem intra membranam pleuram satis densam ac firmam & musculos thoracis ad pulmonum substantiam transire & per eorum, qua undique cincti sunt, membranam itidem satis firmam penetrare posse. Non enim probabile est has membranas à sanguine sincero puro in pleura stagnante corrodi posse nec à pure extravasato & in cavitate pectoris hærente, quoniam hoc non bene attingere posset hanc pulmonum membranam. Præterea si hæc una cum pulmonum substantia à purulenta hujusmodi materia notabiliter esset corrosa, remaneret certe exulceratio nec tam cito consolidationem recipere possent, quãtamen in pleuritidis sæpius intra dies 7. vel 9. vel 11. perfecte restitutis fieri certum est. Firmiter igitur concludendum esse censemus, secundum hypotheses Excell. Dn. Præsidis in *Dissert. de pleurit. & peripneum.* §. 9. & 12. *Omniem pleuritidem veram non secus ac peripneumoniam immediate hospitari in pulmonum corpore, adeoque illos constituere principale hujus morbi subjectum, non vero pleuram, tali*

tamen differentia, quod in pleuritide levis saltem & magis superficialis in lobo nempe pulmonis, stasis sanguinis existat inflammatoria, in peripneumonia gravior & profundior illa sit & vasa occupet majora, quandoque in uno quandoque in altero latere. Quæ assertio cum solidis rationum momentis & experimentis circa cadaverorum pleuritico- rum sectiones factis & ibidem allegatis ex professo sit decisa, L. B. illuc placide amandatum volumus. Consentientem quoque præter alios complures Autores hac in re invenimus Vincentium Baronium, Medicum Italum celeberr. in pereleganti & raro tractatu de pleuripneumonia conscripto.

§. IIX. Empyematis autem seu suppurationis in pectore titulum minime huic affectui adæquatum esse, facile patet. Arguere id quidem videtur locus ex Hippocrate, in Coac. p. 565. secund. edit. Lindenii, quem huc allegandum esse duximus: *Quibus latus sublevatum est in tumorem ac calidius est, & inclinatio in alterum, gravitas aliqua impendere videtur, his pus ex una parte est.* Multæ namque sunt, quæ huic opinioni obstant rationes. Primo enim empyema supponit semper alios, quos pressio pede sequi solet, tanquam productum eorum, inflammatorios morbos ad suppurationem tendentes v. g. pleuritidem, peripneumoniam, si non bene curentur, vel per *άναστροφήν* sufficientem terminentur. *Pure enim in pleuritide (intra spatium 14. circiter dierum) sive ab copia sive ob debilitatem non repurgato, vel moriendum est suffocatione vel transitus fit in alium morbum chronicum phthisin, empyema &c.* uti secundum Divi Coi effectum optime docet Excell. & celeberr. Dn. Wedelius, itidem Præceptor meus jugi pietate & observantia prosequendus in Aphor. aphorismorum L. V. aph. VIII. n. 3. 4. (2) Communissime etiam succedere solet vomicæ tuberculis pulmonum ruptis, aut etiam quandoque effusæ in phthisi

phthisi materiæ purulentæ. (3) Materia ejus, five per paracenthesin educta, five à natura, per os alvum, urinam, uti variæ observationes docent, excreta, semper est purulenta, vitioso ac fœtido charactere notata, quæ omnia de nostro affectu neutiquam affirmari posse, ex antedictis partim, partim ex dicendis adhuc dilucescet.

§.XI. Ipsam autem materiam in cavitate pectoris collectam quod jam attinet, illam forte ex læsione ductus thoracici derivandam esse, non incommode autumare quispiam posset, nec dissimulabimus h. l. etiam nosmet per aliquot tempus olim hac in opinione fuisse, haud improbabilibus hujus sententiæ rationibus inductos, quod scilicet ramus quidam hujus ductus à decubitu lymphæ acris stagnantis prope insertionem ductus in venam axillarem & subclaviam, fuerit corrosus & disruptus, unde portio materiæ istius chylosæ continuo efflueret. Verum enim vero, ut ut hæc opinio nullam contradictionem involvat, experientia vero postea edocti, rem aliter se habere comperimus. Nam cum ex accidenti in mentem veniret Medicorum disceptatio de urina potus & feri, an nempe illa via ordinaria per circulum sanguinis ad renes deduceretur, vel immediate ex ventriculo transfludans per poros occultos ad vesicam urinariam statim ferretur, cogitavimus illico, hanc litem à nostro sic affecto, præsupposita scilicet in illo læsione ductus thoracici, experimento quodam instituto facile posse dirimi. Rogatus igitur à nobis Vir pl. Reverendus, ut post consuetam mane evacuationem istius materiæ, certam portionem aquæ calidæ Thee assumeret, & breve post temporis spatium deligaret iterum aperturam, videndo nempe, an post aquam epotam materia majori quantitate ac magis diluta prodiret. Dictum factum. Non detrectavit itaque hujus rei periculum face-

re, sed nulla ne minima quidem hujus materiæ alteratio fuit observata, ita ut nec magis fluida nec quantitate, qualitate aut colore mutata, sed more solito apparuerit, pauca tamen quantitate vix ad cochlear dimidium, quantum nempe brevi isto temporis spatio colligi poterat. Quod experimentum unicum sufficeret ad refellendam læsionem ductus thoracici. Præterea notavimus in Viro laudato, quando morbo afflicto, quod sæpius accidit, minorem portionem cibi ac potus ac alias solet, assumserit, nihilominus materiam eadem quantitate ac in statu sano, quin & majori quoque copia fuisse eductam, certo indicio eam non ex ductu thoracico ortum suum immediate ducere posse.

§. X. Hisce omnibus jam satis, uti existimo, discussis, expendi ulterius meretur quæstio, qualisnam in statu præfenti consideratus sit ille affectus, sublato nempe jam morbo priori, & quo nomine nunc commode indigitandus sit? Diceret quis esse abscessum aut ulcus quoddam pectoris inveteratum, vel potius fistulam thoracis, quæ ob solutionem continui seu filamentorum dilacerationem indeque formatam cavitatem perpetuo lympham & ichorosum quoddam serum ex sinu suo effunderet. Ast huic sententiæ statim repugnat (1) quod nullus hic adsit canalis continuus & oblongus oræ callosæ ac præduræ, cicatrice quadam obductus, quale quid in fistulis tantum non omnibus semper reperitur. (2) Quod ipsa materia qualis ab initio & etiamnum quotidie egreditur minime sit foeda putrida aut purulenta malo odore prædita uti in empyemate solenne est, nec ichor acris malignus partes vicinas corrodens, sicuti in fistulis observatur, sed testimonio sensuum, potius gelatinosa ac γλισχρα sensu medico dulcis instar

instar lactis vel emulsionis, & demum sine odore laudabilis ac nutritibilis, uti id varia experimenta circa ejus indolem explorandam abunde comprobant.

§. XI. Quantum autem ex omnibus hujus affectus circumstantiis simul sumptis & expensis, licet judicare, ut his remotis brevem epicrisin addamus, statuimus eum, quali schemate hodiernum apparet, præ se quidem ferre speciem abscessus, minime tamen pus aut ulcerosam saniem ibi secerni. Igitur non dubitamus asserere, materiam istam quotidie ex cavitate thoracis plorantem nihil aliud esse quam succi chylosi ac nutritii ex vasis & arteriis intercostalibus membrana sua ob decubitus feri acris depascentis, privatis, perpetuum stillicidium. Etenim cum horum vasorum orificia dilatata, & membrana sua qua alias investiuntur ac teguntur in initio morbi penitus destituta sint, & corrosa à materia acri in interstitiis musculorum intercostalium tum temporis stagnante, fieri aliter non potest, quoniam nova eorum integumenta denuo accrescere nequeunt, quod pori eorum continuo hiantes & adhuc patentes ob solutionem continui succum istum quem vehunt indefinenter plorent & effundant; Non mirum igitur est sed rationi maxime consentaneum, chylosam materiam, vel etiam lympham gelatinosam per ductum thoracicum & venam subclaviam ad cor delatam, nondum intime cum sanguine mixtam per arteriam subclaviam & truncum aortæ descendentem ad vasa intercostalia ablegari, unde colore suo parum immutato data porta erumpit, & sensim sic in cavitate thoracis collecta ulterius per aperturam istam, beneficio siphonis intrusi quotidie educitur certa ejus portio.

SECTIO II.

DE LOCO PRINCIPALITER AFFECTO

MALIQUE SEDE.

§. I.

Proximum jam erit ut de parte læsa nunc differamus, & subjectum quod inhæfionis adæquatum et idiopathicum ipsius morbi determinemus, ubi nempe labes primario concepta sit. De pulmonibus id, si accurate loquendum est, affirmari neutiquam posse in prioribus jam satis ostensum esse arbitror. Interim tamen plane infantes eosdem mansisse non possumus dicere, id enim mox refutaret in principio respiratio difficilis valde laboriosa, cum anxietate præcordiorum, sono loquelæ impedito & suffocationem quasi minitante. Sicuti enim pulmones tanquam folles & ventilabra microcosmica, præcipue respirationi & formandæ voci instar organi musici inserviunt, ita etiam his actionibus impeditis vel sublati, certum indicium est eosdem labem quandam, licet non per se, aliunde tamen concepisse. Certum igitur est, in initio quidem eosdem esse affectos sed non nisi per consensum, ob vasorum nempe communicationem, idque confirmat copiola materiæ post usum pilularum opiatorum, per *ἀνναθάρασιν*, excretio, licet ad morbum solvendum insufficiens. Cum enim pateat ex ipsa morbi historia ejusque circumstantiis allatis, ægrum nostrum semper ad defluxiones & decubitus humorum acrium stagnantium, coryzam, catarrhos rheumatismos pronum fuisse, & præterea sanguis ejus sit crassus ac viscidus difficulter per poros & vascula mobilis, facile poterit concipi, cum in interstitiis musculorum intercostalium ejusque vasis & membranis graves illorum stases & decubitus lymphæ

phæ vitiolæ dramata ac tragædias suas luserint, & manam communicationem vasorum etiam pulmonum corpora non intacta ab iisdem manere potuisse. Docet enim experientia & nihil etiam notius est, quam quod illi, qui sanguinem talem in vasis alunt atque tovent, & qui crebrius detinentur rheumaticis ac spasmodicis circa costas scapulas & dorsum doloribus, quam maxime dispositi sint ad pulmonum varios affectus, qui ob consensum & symbolisnum vasorum communium facillime inde suscipere solent læsionem. Hinc autem fit, cum sanguis viscosus & qualitate acri imbutus in circulatione libera sua sit impeditus & in vasis intercostalibus stagnans, ut cum impetu quasi illabatur in pulmones, ibique hærens magnam pectoris oppressionem, respirandi molestiam, tusses vehementes, præcordiorum anxietates, ut in casu nostro apparet, necessario inducat.

§. II. Subjectum igitur morbi inhæsionis & locus principaliter affectus, ubi malum immediate hospitatum sit, procul omni dubio, sunt musculorum intercostalium ubi & hodiernum læsio hæret, spatia intermedia, & ipsa membrana pleura quoad duplicaturam suam, cujus vasa à molesto & copioso decubitu sanguinis & feri vitiosi, mirum in modum distenta ac læsa, ampliatis poris succum suum quem vehunt deponere debuerint. Hujus itaque cum magna moles sensim congesta & intra pleuræ mediastini duplicaturam collecta nullum exitum invenerit, fieri aliter non potuit, quin ipsas membranas distendendo & dilatando maximum spatium in ipso thoracis cavo occupaverit. Hinc autem statim ratio reddi poterit, subitanæ illius & magnæ dilatationis totius pectoris, instar gibberis elati

ex-

excrefcentis, ut cor atque pulmo finifter verſus dextrum latus detorquerentur, & in angulum quaſi anguſtum coarctarentur, ut pulſus cordis vehemens ſub papilla dextra tactu & viſu perciperetur. Etenim cum ex lecto ſurgens, totum corpus antea in quiete conſtitutum, motu iſto inſolito conquateretur & poſitura erecta extenderetur, ligamenta quibus hæ partes invicem connectuntur quin & nervorum filamenta violenter diſtendebantur, ut dolores inſignes inde ſtatim perceperit, unde & membrana pleura, à materiæ copia jam ſatis dilatata ac tenuis facta, undique compreſſa ac vellicata accedente hoc motu ſatis valido, ſimul ac ſemel divulſa eſt, & effectum notabilem produxit. Hinc & poſt paracentheſin & materiæ evacuationem per aliquot tempus in ſiniſtra cavitate pectoris ſubauditus eſt ſtrepitus, ac ſi ſtrophium quoddam in aqua volutaretur, nullam aliam ob cauſam, quam quod membrana iſta, quæ quaſi folliculus materiæ comprehendere, jam ſeparata & flaccida facta facilem motum & conquaſſationem in vacuo nunc jam ſpatio ſuſcipere poſſet.

§. III. Porro inter partes læſas, per communioſi affectus merito etiam referendum erit mediſtinum pulmones & ipſam thoracis cavitatem in 2. partes ſecundum longitudinem diſpeſcens, quod originem habet à pleura quæ e medio pectore recta ad dorſum porrecta hanc membranam conſtituit binis lamellis. Præterquam enim quod magna vaſorum intercoſtalium & pleuræ præcipue cum hac membrana ſit communio, ut his labefactatis etiam illa non illæſa & intacta permanere potuerit, valde etiam probabile eſt, materiæ iſtam extravasatam intra muſculos thoracis & duplicaturam pleuræ ſtagnantem, etiam huc ulterius delatam, ſpatium extensionis ſibi quaſiſſe.

SECT.

SECTIO III.

DE VARIORUM MORBI SYMPTOMATUM NEXU ET CAUSIS.

§. I.

Affectum itaque hunc nostrum nil nisi perpetuum, esse stillicidium succi gelatinosi ac nutritii ex poris arteriarum intercostalium nimium distentis, superioribus jam satis demonstratum esse arbitror. Jam autem consultum erit, ut hanc ipsam assertionem ulterius per causas explicemus, solidisque rationibus corroboremus. (1) Materiam esse gelatinosam & chilosam exinde devincitur, quoniam sapore est dulcis, omnis foeteris & corruptionis expers; (2) Si enim spiritu vini rectificatissimo, oleo tartari per deliquium misceatur, colori etiam ignis exponatur, abit in massam spissam gelatinosam. Non purum autem esse chylum, sed cum gelatina sanguinis mixtum hunc succum ex eo discimus, quoniam non est perfecte albus, uti chylus, neque fluidus satis & dilutus sed spissus, neque a potu largiori fluidior evadit, nec post cibum & potum mox rursus colligitur materia in thoracis cavo, unde vias ac vasa quæ chylum purum vehunt, non esse primario læsa luculentissime perspicitur potest. Qua propter originem hujus perpetuæ effluxionis ex sanguine ejusque vasis arteriosis in thorace collocatis, principaliter repetendam esse dubitari vix poterit. Diximus autem arterias intercostales primario esse læsas, quia hæ primo ex sinistro cordis receptaculo recipiunt chylum, quem antequam intime cum sanguine miscentur, continent in quantitate satis insigni. Deinceps fidem facit nostræ assertioni ipse locus affectus, de quo

jam

jam egimus, ubi statim inter initia morbi labem quandam conceptam esse, patet ex morbi Historia.

§. II. Est autem nostra sententia à gravissimis doloribus, constrictionibus spasmodicis in sensibilissima thoracis membrana pleura obortis, vasa lymphatica fuisse compressa & contracta, ut difficillimus per venas sanguinis reditus sit factus, & penitus ablata æqualitas quæ est inter sanguinis per arterias appulsus & eadem quantitate regressus. Factum hinc est ut mirum in modum à sanguine stagnante distentis arteriis, tunicarum earum pori & oscula nimium aperta & diducta fuerint, ex quibus postea exstillavit intra pleuræ duplicaturam lymphaticus ille chylosus succus nutritius, maxima in quantitate. A regressu vero sanguinis per venas difficiliori distendi vasa arteriosa, ampliari glandularum ductus, qui non nisi continuationes arteriarum sunt, & ex ipsis postmodum succum spissidiorem ejici, quamplurimis argumentis evinci poterit. Videmus enim id clarissime in coryza diuturna, in tussi humida & penes mulieres, in albo fluore, ubi per longum tempus hi affectus duraverint, quod sæpius diu post secernatur materia spissioris consistentiæ, flavescens coloris, tam per nares, os ipsum, quam & per uterum, quæ nullam aliam habet originem, quam sanguinem retrogradum per venas motum tardiorum inæqualem tonum glandularum relaxatum, arteriarum distensionem tubulorumque secretoriorum nimiam apertionem.

§. III. Profluit hinc necessario crassiusculum serum cum limpha tenui dilutiori, quæ postea in poros lymphaticorum vasorum recipitur, remanente spissidiori substantia. Perdurare hæ ejectiones crassæ viscidæ flavescen-

tis, materiæ diu sæpius solent, quoniam arteriarum tuni-
cæ supra modum distentæ non tam subito rursus rede-
unt in pristinam suam formam magnitudinemque, nec
tonus fibrarum à copia humidi laxatus & debilitatus, re-
cipit mox robur & restituitur in integrum, unde etiam
pori & tubuli valde ampliati non tam facile rursus sese
occludunt, nec coarctati angustioresque fieri iterum
possunt.

§. IV. Chilosæ autem materiæ in nostro casu pro-
fluxus inde provenit, quoniam sanguis in affecto loco
plurimo chylo scatere solet, unde accidit sæpius in vul-
neribus thoracis, in ejus exulcerationibus & empyema-
tibus diutius quandoque remanere effluxionem succi chy-
losi, eandem nempe ob causam jam dictam. In cujus
rei fidem, exempla multa afferre possemus. Sufficiat ve-
ro una vel altera historia circa hanc rem observata. Vi-
delicet, adolenscens quidam in hac urbe 17. circiter an-
norum, post languorem, pectoris angustiam febremque
pectoraalem tandem in sinistro latere thoracis incidit in
tumorem magnum. Medicorum opera in hoc tollendo
omnis fuit frustranea. Adivit itaque carnificem sicuti id
genus hominum solet, qui nisi præsens Medici auxilium
conspiciunt extrema quærunt, secundum illud Poetæ:

Flectere si nequeo superos, achoranta movebo.

Novus itaque hic adscitus medicafter statim applicavit
sua emplastra, quibus etiam mox aperturam procuravit
& quidem versus spinam intra 7. & 8. costam. Hinc co-
piofa albidæ materiæ facta fuit effusio ex thorace, non
citra notabilem ægrotantis *ἐνφλογίαν*. Cum vero carni-
fex tumorem pro ulcere haberet, primo turundis eun-
dem tractavit, deinde adhibitis consolidantibus vulnus

iterum coalescebat. Quo facto autem æger pejus se habere cœpit, donec materia in thorace denuo collecta, sua sponte paulo altius versus scrobiculum cordis intra 6. & 7. costam exitum sibi paraverit. Apertura vero hæc ad consolidationem non potuit deduci, sed materia chilosa alba quæ assumptorum ciborum odorem quandoque refert perpetuo effluit præsertim sub inspirationis actu. Nullum dubium est & hic quoque simili modo, uti antea dictum fieri secessionem in spatio, quod est intra costas & pleuram, sive etiam intra duplicaturam pleuræ, succi cujusdam chilosi ab ipso sanguine, nempe per pororum in arteriis nimiam apertionem, & seri ac lymphæ decubitus in parte affecta solito majorem largioremque. Præterea referunt Miscellanea Nat. curios. Dec. II. A. VI. p. 417. sequentem observationem: Mulier quædam cultro in sinistro pectoris latere transfossa fuit, ubi per vulnus istud interdum effluxit chylus, & quando ægra cibis solidioribus cibis usa fuerit, spissidior quoque fuit, si vero dilutiora alimenta assumpserit, tenuis quoque fluidus apparuit iste liquor albidus. Accidit etiam abscessum thoracis subsequi quandoquo ejuscemodi materiæ separationem. Ita Miscellanea N. C. Dec. II. A. VIII. p. 105. mentionem faciunt abscessus thoracis per apertionem feliciter curati, postea vero successive collecta fuit materia quædam albicans lacti simillima, quæ etiam diu evacuata est per foramen apertum citra foeterem.

§. V. Assertionem itaque nostram postquam rationibus & experientia jam fatis adstruximus, res jam & ordo ulterius postulant, ut paulo accuratius in causas & genesin hujus mali inquireamus. Vir nempe honoratissimus ob *temperamentum colerico-melancholicum, texturam*
sensu

sensibiliorem, habitum corporis gracilem, sine motu sufficienti quietem vitam & delectationem ciborum acidorum sanguinem dispositum habuit maxime ad generationem biliofarum & tartareorum humorum, & feri impuri falsi acris, quo præsente facile fiunt rheumatismi, dolores tensivi artuum, catarrhi, tusses acres, siccae, vehementes convulsivæ quibus pathematibus etiam jam ante affectum istum sæpius correptus fuit, & etiamnum quandoque iisdem affligitur. Et quod notabile est, malum hoc primordia cepit ex coryza sæpius suppressa. Etenim si ex defectu naturæ vigoris ferum quantitate & qualitate peccans à sanguine separatum non foras ejicitur per congrua emunctoria, fuscitat intus graviora adhuc mala. Inde profluxerunt quoque in nostro ægrotante tussis sicca gravis sine ulla materiæ ejectione ollam cavam resonans, ad semestre spatium perducans.

§. VI. Hac rerum facie cum æger nihilominus variis aeris humidi ac frigidi injuriis exposuerit corpus infirmum, accessit postea *febris acuta pectoralis cum dolore lateris punctorio*. Orta fuit hæc ipsa ex decubitu serosi acris sanguinis in vasculis intercostalibus, eorumque facta inde inflammatione, unde etiam dolor acutus punctorius ob distensionem & vellicationem membranæ pleuræ enatus fuit. Oritur autem sæpissime talis febris ex transpiratione impedita, qua accumulatio feri acris fit ejusque collectio copiosa, unde etiam tussis gravis cum dolore latere punctorio. Assumpsit æger pilulas pectorales, opiatas, sed citra singularem fructum utpote respiratio anxiosa & difficilior reddita fuit. Et ut verum fateamur, minus huc quadrant opiata. Quamvis enim dolorum atrociam mitigando, gravia quædam symptomata præ-

scindere possint, nihilominus & hoc secum gerunt incommodi, ut præpediendo transpirationem & halituositatem liberiores, sordium harum accumulationem, & sic iisdem fixam sedem & immobilitatem concilient, ut etiam hic factum esse videmus.

§. VII. Attendi porro meretur, quod *cibi omnes assumpti per vomitum statim iterum ejecti* fuerint. Scæpius hoc accidit in tussi graviore. Nam notum est quod parvum non modo ramos spargat ad ipsos pulmones ejusque tunicas asperamque arteriam, sed & ad ipsum ventriculum, unde ob consensum & communionem nervorum, vellicatis & convulsis nervis in thorace, ipse ventriculus molestissime afficitur contractorio convulsivo motu. Cum igitur ne quicquam cibi & alimentorum retinere potuerit æger, *secuta fuit macies & vires corporis omnino exhaustæ*. Nutritur enim corpus & resarciuntur vires si humores sunt benigni & laudabiles, si placidi & æquabiles sunt eorum in corpore motus; Hic autem cum tota œconomia motuum sit turbata, dolores adsunt, febriles commotiones, effusiones secessiones & stagnationes humorum fiunt aliorum, & acrimonia manifesta laborant fluores vitales.

§. VIII. *Supervenit etiam hyberno tempore purpura*. Hæc testatur de exundantia feri excrementitii salis biliosis particulis infarcti, unde facillime illa excitari solet, imo generatur etiam libenter in aliis morbis dum nempe per febrilem calorem intus recondita & in involucris viscosi sanguinis latitantia salia, motu evocantur explicantur & acriora reddita, postea magno motuum impetu subsecuto quandoque ad partes extremas propelluntur. Retrocessionem purpuræ ab aere externo frigido, secutum mox fuit *asthma*. Nihil enim frequentius occurrit

in praxi, quam ut sordes salinæ, causticæ, à sanguine semel separatæ quando fuerint, postmodum vero ad habitum corporis retropulsæ, si retrocedant, longe violentiores fiant, & vellicationibus contractionibus, & spasms, in nerveis maxime & sensibilibus partibus sævissima sæpius pathemata progignant. Plerumque vero subsequi solet asthma suffocativum, dum nempe in bronchias pulmonum eorumque expansiones nerveas irruit materia retropulla acris. Convulsi autem nervi crispati & constricti remoram injiciunt sanguinis libero per pulmones circulo. Generalis enim regula est nervis præter naturam affectis & spasmotice adstrictis, turbari quoque sanguinem in suo motu ac circulo.

§. IX. Hinc secuti quoque fuerunt dolores in pectore & abdomine una cum obstructione alvi contumacissima; flatibus enim turgebat totum abdomen, ita ut injectio clysmatum sæpius repetita nunquam penetrare potuerit, manifesto indicio, nervos qui ad thoracem & abdominis viscera tendunt, nempe par octavum & intercostale à materia acri vellicante, rotropulsa vehementissime affectos fuisse & mirum in modum constrictos. Notum vero est nervorum vellicationem necessario sequi spasmum fibrarumque musculolarum & nervosarum constrictionem. Notum quoque porro est, ex spasms dolorificis nervosarum partium etiam in remotis & disitis locis, alvum pertinaciter constringi, flatibusque repleri. Conspicimus id ipsum clarissimo in epilepsia, in dolore ex calculo renum & vesicæ velleæ, malo hypochondriaco, hysterico, cephalalgia, dentium aliisque sævissimis doloribus, ob consensum nempe nervorum.

§. X. *Ineffabiles porro cruciatus ager sensit in corpore,* qui utique testantur de vellicatione & irritatione vehementi

menti facta à spiculis acribus causticis feri stimulantibus. Sub doloribus vero istis spasmodicis *sensationes erant ac si pruna candentes intus laterent ac instar globulorum igneorum circa regionem lienis circumvolverentur.* Quandocunque incendium intensissimum & ardor magnus interne percipitur, certum indicum est, partem esse inflammata, stagnare sanguinem & vasa esse distenta. Lienis autem regio, quam judicabat ægrotans, partem esse affectam, potius fuit regio thoracis. Nam notum est, quod diaphragma sub quo latitat lien, versus dorsum longe inferiorem sedem occupet ipso liene. Etenim sæpius se extendit ad 12. vertebra dorsi sub costis spuris, unde in corpore respectu lienis præsertim circa regionem spinæ valde inferiorem habet situm.

§. XI. Dolores acuti postquam cessarunt, *abdomen collapsum est, sed gravativus dolor totum corpus occupabat;* Constrictio nempe ista spasmotica & vellicatoria cum exspiraverit, secutus fuit tumor, non secus ac videmus post graves dolores, in arthritide, podagra, dolore dentium, fieri demum relaxationes nimias partium & inde surgentes tumores. Nam post dolores graves & vellicationes, mirum in modum debilitantur nervi, tonus partium destruitur, languidior fit sanguinis circulus per venas, unde fiunt decubitus *scars* humorum tumoresque: Ita etiam in nostro ægro tumor in cavo thoracis ob secessionem & extravasationem copiosi feri per poros arteriarum distentas ob difficilem sanguinis & lymphæ reditum pervenas; & cum successive magna quantitas collecta fuerit in cavitate thoracis, pleura, intra quam vasa feruntur, fuit separata & divulsa, unde enatus fuit hic maximus tumor, qui non modo pulmones & ipsum cor violentia sua

su detrufit ad dextrum latus ut pulfus ibidem sentiretur ; fed et finiftrum latus extuberare faciebat inftar gibberis magni convexi cum fuma præcordiorum anxietate.

§. XII. *Non poterat finiftro pede terram attingere:* quoniam à tumore diftenti nimium funt intercoftales nervi, qui etiam ramum majorem mittunt ad ipfum femur unde nullum robur in pedibus supererat. Aderat refpiratio difficilis cum anxietate præcordiorum ob dilatatum nimis diaphragma & pulmones compreffos. Cibi non poterant deglutiri ob œfophagum & ventriculum à tumore valde compreffum. *Sequebatur tumor oedematofus pedum.* Fit fœpiffime in debilitatis & ubi circulus fanguinis per cor & arterias venasque difficilis eft. Debilitato enim circulo fpirituafcentia fanguinis perit, tonus partium labafcit, fanguis lentus & craffus fit & ad regreffum per venas inidoneus, unde tumorum genesis.

§. XIII. Rectiffime tandem *apertus fuit tumor* & fub ipfa apertione fonus excitabatur ac fi vefica aqua diftenta rumperetur, manifefto indicio: collectam fuiffe materiam in folliculo. *Materia fucceffive XII. menfura diebus 4. fuerunt eductæ.* Indicat hæc quantitas extraordinariam tumoris magnitudinem. Indicat quoque non purulentam fuiffe materiam, fed potius benignam gelatinofam. *Auditus quafi fuit frepitus in cavitate finiftra membrana circumvoluta*, propter membranam pleuræ nimis diftentam & jam flaccidam factam. Continuavit egreffus iftius materiæ jam per X. annos adeo ut fingulis diebus dimidiam libram adhuc excernat. Ratio hujus perpetui fluxus eft, quod vafa intercoftalia

E

præ-

præsertim arteriosa in loco affecto adhuc valde distenta sint, porique eorum ampliati & aperti, unde cum in læsa parte circulus sanguinis valde sit debilis & regressus per venas valde difficilis, accidit ut per tubulos arteriarum quos sibi materia apertos formavit, perpetuo adhuc destillet materia. Et quod valde dignum notatu est, dolore rheumatico vel punctorio accedente in parte affecta sub paroxysmo rheumatismi, qui quandoque adhuc infestat ægrum, majorem quantitatem quandoque ad libram & ultra effluere, quam si fuerit in statu sano, non aliam ob rationem quam quod in parte jam ante debiliori major fiat stasis & magnus decubitus humorum, unde arteriæ sanguinis copia refertæ distentæq; majorem fundunt materiæ copiam. Nil autem magis nocet viro optimo quam frigus intensum, quoniam valde inimicum est nervis, ipse vero macilentus cum sit & texturæ sensibilibioris, hinc frigidus aer constrictione sua nervosas partes facilius in anormolas motiones rapit, & facile inflammationes circa aperturam causatur.

SECTIO IV. DE PHÆNOMENORUM NOTABILIORUM RESOLUTIONE.

§. I.

IN ipsa deligatione, postquam materia evacuata est, aer cum tanto impetu egreditur, ut instar folium strepitum edat & flammam candellæ admota exstinguat. Deducere nonnulli volunt hoc phænomenon ex pulmonum læsione. Nam persuasum sibi habent, aerem in inspiratione attractum per pulmones læsos transire in thoracem & sic expelli per vulnus, sed falluntur. Potius
in

in inspiratione cum dilatatur cavitas thoracis, aer per vulnus ingreditur non secus ac diductis parietibus folium, aer intrat per eorum foramen; quando vero rursus exspiratio fit & thorax concidit, diaphragma autem deprimitur, tunc denuo expellitur ipse aer externus atmosphæricus. Notabile quoque est, quod si nimium aeris thoracem ingrediatur, faucium vehemens constrictio cum tussi molesta sequatur. Nam si non omnis aer fuerit per foramen expulsus & hoc turunda obturatur, tunc aer atmosphæricus in cavitate thoracis impedit liberam expansionem pulmonum, unde anxietatis & constrictionis fit sensus.

§. II. Alterum curiosum phænomenon est: quod quotiescunque ad mundificandum vulnus & eluendum pectus liquor quidam injectus sit per syringam in cavitatem thoracis constans ex vino Hispan. vel etiam aqua cum rad. chin sarsaparill. decocta, singulis vicibus post horulam subsecutus sit paroxysmus perfecte febrilis. Hoc jam phænomenon egregie si quid aliud, explicat generationem febrium. Sunt qui sibi persuadent, febri-les sanguinis & humorum motus institui a natura, quæ quasi prævidens malum, prudenti intentione ac directione motus tales instituat ad amovendum illud quod ipsi est molestum. Verum enim vero dependet febris productio ex mechanica quadam necessitate, & fiunt plerumque febres non tam à quantitate vitiosa sed potius à qualitate, & ut plurimum à materia exili ac ricautica vellicante nervos unde ferme omnibus gravioribus doloribus febres sunt adstites. Cessante enim dolore cessare etiam solet febris. Et ut ut non semper vellicationes nervulorum qui comitantur arterias & vasa

cordis, sequantur dolores, sequitur tamen eas ipsas febris, unde exilissima sæpe materia, modo vellicante qualitate fit instructa producit febres, quod videmus in contagio pestis, variolarum morbillorum, purpuræ, tertianæ epidemicæ: quæ sæpius terminari solet per pustulas labiorum.

§. III. Thermarum quoque Carolinarum balneo calido sæpius in instanti generari febres non novum est. Videmus exinde clarissime, intensas illas ac impetuosas cordis & arteriarum in febribus commotiones & pulsationes, quæ febrem progignunt, spasmoticas quoque constrictiones cutis in horripilatione pendere à nervis p. n. affectis, vellicatis, irritatis ac convulsis, unde etiam omne adstrictivum, omne anodynum sive ab extra sive ab intra usurpatur, omne quoque narcoticum suspendit febriles insultus, quoniam disponit ita nervos, ut ad actiones & insultus materiæ peccantis minus se commoveant & afficiantur. Eodem modo dum liquor ille vellicans heterogeneus diaphragma & partem affectam sensibilem irritaverit, mox subsequutus fuit perfectus paroxysmus febrilis, cum horripilatione, pulsu celeri, calore intenso durans quandoque per aliquot dies.

§. IV. Porro notabile quoque phænomenon est, quod diu remanente tumore in thorace nec per viam solitam evacuato, in ipso ore sentiatur non modo ejus sapor, sed & ipsa materia ratione substantiæ suæ. Deducimus hoc ipsum ex eo, quod nempe, quando vir laudatissimus sinistro lateri incumbit, humor per poros venarum & vasorum lymphaticorum rursus recipiatur & postea glandulis asperæ arteriæ, faucibusque, circulatione huc adductus separetur. Per poros extravasatam,
mate-

materiam recipi posse in venas testatum faciunt purgationes fortiores in cachecticis & hydropicis ubi serum extra vasa positum reductum in sanguinem magna in copia expurgatur; Hæc quoque est ratio, quare purulenta materia, in abscessibus thoracis sæpius educatur per alvum & urinam. Quotidiano etiam experimento videmus coagulatum & extravasatum in contusionibus serum, debitis fomentis & cataplasmatibus adhibitis, dissipari & rursus recipi in sanguinem.

SECTIO V.

DE SANATIONE HUIUS AFFECTUS.

§. I.

EXplicatis jam omnibus symptomatibus & phænomenis, restat ut sententiam quoque nostram afferamus circa curam instituendam. Primo autem occurrit quæstio ? num stillicidium istud succi nutritii possit in totum auferri, vel an spes sit, sublato nempe hoc affectu, ut in integrum restituatur. Vir pl. Reverendus. Sed respondemus, exiguam spem hac in re promittere nos posse. Nam notum est, quod vitia in mala conformatione solidarum partium & pororum, tubulorumque difficillime perfectam medelam admittant, maxime in iis partibus ad quas proxime medicamentis non possumus pertingere. Deinde periculum etiam hic esset constringentia applicare, utpote hæc non modo vellendo sensibiles partes producerent majora mala, sed & violentia coarctando & occludendo poros, metus esset, ne produceretur nova inflammatio, nova abscessio vel decubitus materiæ.

§. II. Tacendum quod difficillime occludi possit foramen in thoracem penetrans. Etenim omnia hic

facta sunt callosa, cartilaginea. Notum vero ex chirurgicis, ibi non bonam & laudabilem posse crescere carnem, nec consolidationem veram, tutam ac constantem sperandam. Difficillimum enim esset exequi, ut calli prius auferrentur. Nam caustica quæ inserviunt huic scopo hic applicare non convenit. Potius intantum est finendum hoc malum & committendum Deo & naturæ.

§. III. Interim ne gravius accedat malum, & ne variis symptomatibus molestet: oportet observare certas quasdam cautelas & regulas, quales jam breviter communicabimus, quæ instar omnium esse poterunt:

(1) Deligatio consueta ad minimum semel vel bis de die fiat, ubi semper materia illa evacuetur collecta; cannula usurpetur quæ auro obducta oleo amygd. dulc. inuncta esse debet.

(2) Singulis mensibus injiciatur bis de die infusum scordii & veronicæ, cum vino Hispanico, additis floribus rosarum & momento myrrhæ.

(3) Externo emplastrum saturninum vel diapompholigos applicetur.

(4) Aer serenus & temperatus sicuti optimus est, ita sedulo evitandus omnis frigidus, humidus & vaporibus nebulisque repletus.

(5) Cibis utatur parum acidis & salitis, non nimis aromatibus & calidis rebus conditis; carnibus vescatur junioribus; & inter esculenta eligat, quæ bonum chylum præbent.

(6) Potus vini dulcis optimi moderatus summe proficu-

ficuus erit. Ante omnia autem commendanda sunt juscula ex alimentosis succis & vegetabilibus selectis præparata.

(8) A medicamentis calidioribus & volatilibus nimis, sedulo abstinendum. Interdum tamen oleosum quoddam sal volatile cum tinctura antimonii mixtum adhiberi potest præsertim post prandium, ad chylicationem bonam promovendam.

(9) Alvus quando obstructa est, pillulæ rhabarbarinæ in usum vocari possunt.

(10) Ad rheumatismos & decubitus feri acris quoniam dispositio adest, infusis calidis veronicæ, scorzone-ræ scordii &c. cum dimidia parte lactis calidi mixtis frequenter utendum erit.

(11) Paroxysmus ejusmodi si præsens sit, emulsionem ex sem. 4. frigidis papaveris, amygd. dulc. ad mitigandos dolores rheumaticos proderunt. Item diaphoretica ex antimonio parata, ejusque sulph. probe fixato cum croco solis mixto frequenter tum usurpanda.

(12) In tussi molesta, pilulæ de styrace, i. laudanum pectorale ad scrupulum semis vesperi ante somnum, optimam præstabunt operam.

§. IV. Et hæc de affectu hoc rarissimo qualiacunque nostra fuere cogitata, præsentī hac Diatriba communicanda, ut ut minus compta rudi adhuc & pingui minerva. Quod si dies diem meliora docuerit, Deo sospitante, hæc etiam olim emendatiora, forsan & limitiora pro-

proditura esse, promitto. Interea Supremo Numini, cui
 infinitæ à me debentur grates pro hætenus concessa
 gratia porro commendo vias meas, amico lectori
 autem, qualiacunque nostra
 conamina.

✱✱✱✱ ✱✱✱✱ ✱✱✱✱ ✱✱ ✱✱ ✱✱✱✱ ✱✱✱✱ ✱✱ ✱✱ ✱✱✱✱ ✱✱

Multi dicuntur medici, sed in arte medendi
 Cultores lassos sæpe Machaon habet.
 Te tua, Vir præstans, rudi secernit aceruo
 Doctrina, ac sæclo monstrat in arte virum.
 Gratulor ægrotis, quorum tu corpora curas;
 Sint vero fani, corpore, mente, precor.

*Clarissimo Dn. Doctorando de honoribus optime
 meritis ita gratulatur*

SAMUEL STRYKIUS, J^Ctus.

✱✱✱✱ ✱✱✱✱ ✱✱✱✱ ✱✱✱✱ ✱✱✱✱ ✱✱✱✱ ✱✱✱✱ ✱✱✱✱ ✱✱✱✱

CLARISSIMO DN. CANDIDATO
 S. P. D.
 PRÆSES.

Duplicis generis datur bonum, quo potiri homo
 per vitam suam potest; unum ad animum spectat
 & internum est, alterum ad corpus & externum:
 Illud in unius cujusque potestate positum est; hoc in
 nul-

nullius: illud solidam & perfectam animi tranquillitatem adfert; hoc nullam constantem voluptatem parit. Est vero illud virtus, alterum sunt fortunæ bona, honores nempe, divitiæ, sanitas. Virtus ut rem paucis explicamus, nil nisi constans propositum est, ea omnia faciendi, quæ rationis lumen suadet, & ne quis ab hoc ipso ullo modo se abduci permittat. Illud vero quod animum perficit & in statum tranquillum profert, ante omnia nobis debet esse commendatissimum. Corpus autem cum non proprie nostrum sit, sed ad externa & mundi corruptibilia pertineat, hinc quoque ejus bona multo inferiora sunt habenda. *Divus Cœlius* commendat maxime Medici virtutis conjugium cum scientia medica, nec sine ratione. Sapientia enim & virtute homo hominem antecellit, & hisce demum vere nobilitatur. Medicus igitur qui fiduciam hominum sibi conciliare, iisque se acceptum reddere cupit, qui vitæ & sanitati aliorum merito præesse debet, virtute, prudentia, consilio aliis præcellat, necesse est, quia ipsi medicinæ inest sapientia & necessario inesse debet. Tu certe, clarissime LEIDENFROSTI, ex quo Te intimius cognovi, id quod ultra triennium se extendit, semper virtute, industria, ardore discendi, aliisque interveniendi, omnibus bonis Te commendasti & pluribus gratum atque acceptum reddidisti. Tu non modo animum ratione & solida in medicina peritia, cujus nunc publicum documentum profert Tuo Marte & ingenio elaboratum; hucusque excoluisti, sed & virtute multis perspecta, obfirmasti. Nullum itaque est dubium, si optimo tuo proposito, veram virtutem una cum solida scientia unice sectandi constanter inhæseris, futurum esse, ut de-

mum

num in Republica, perfecti Medici nomen atque gloriam, indivulsam virtutis comitem, feliciter adipiscaris. Vale.



Artis Pæoniæ, LEIDENFROSTI, grator honores,
Divinumque in curis apprecor auxilium.
Sic Medica poteris collapsas reddere vires
Ægrotis, & opem ferre repente manu.
Non etenim in Medico est semper relevetur ut æger,
Si tamen adfuerit JOVA,juvat subito.

συγχαίρων f.

WOLFG. MELCHIOR Stiffer/D.

Reg. Boruss. Inspector Minist. Hal. & in
Circ. Sal. Pastorque Primarius.



**Errata præcipua post typum expressum
animadversa.**

p. I. in medio hæterogena, pro heterogenea.

p. 10. lin. penult. phænomenon, pro phanomenon, idem.

p. II. lin. 7.

p. 14. ἀναναθάσσειν, pro ἀναναθάσσειν,

p. 25. l. 8. foeteris, pro foetoris. ibid. colori pro calori,

p. 28. l. 26. foeterem pro foetorem.

p. 26. lin. ult. colerico, pro cholerico.

p. 29. l. 16. perducans pro perdurans.

p. 29. l. 14. profluxerunt, lege profluxit.

p. 32. lin. 13. respecta pro respectu.

Ubique in cæteris typus aberraverit à B. L. facilem veniam
& emendationem nobis pollicemur.